



册府元龟
卷之三百五十三
至五



1 3
849
117



門 43
849
卷 117



册府元龜

淮南李嗣京叅閱

西極文翔鳳訂正

豫章黃國琦較釋

將帥部

十四

立功第六

後魏長孫道生太武卽位初以南統將軍汝陰公從
征蠕蠕與尉眷等率衆出白黑兩漠間大捷而還太
武征赫連昌道生以廷尉與司徒長孫翰宗正斌清
爲前驅遂平其國

長孫翰爲司徒襲赫連昌破之太武復征昌翰與廷尉道生宗正娥清率騎二萬爲前驅昌戰敗奔上邽翰以八千騎追之至高平不及而還從襲蠕蠕車駕渡漠大檀奔走其弟匹黎率衆赴之遇翰交戰匹黎潰走斬其渠帥數百人

王度爲衛尉卿從太武征赫連昌討蠕蠕並有功賜爵濟陽公加散騎嘗侍平南將軍詔度率五千騎與叔孫連合擊宋兖州刺史竺靈秀於湖陸大破之

奚眷爲鎮南將軍鎮長安太武幸美稷眷受詔督諸軍事共討山胡白龍于西河破之屠其城斬首數千

級虜其妻子而還太武平姑臧遣眷討沮渠臧孫叔捷弟私署張掖太守宜得宜得奔酒泉酒泉太守無諱與宜得奔高昌獲其二城後沮渠天周復據酒泉眷討平之虜男女四千餘人

尉眷爲安北將軍出鎮北境與平陽王長孫翰擊蠕蠕別帥阿伏干於柞山率師至歌刪山擊蠕蠕別帥使度弟庫仁直引師而北蠕蠕部帥莫孤帥高車騎五千來逆眷擊破之斬首千餘級又從征蠕蠕眷出白黑兩漠之間擊其東部大獲而還又從征赫連昌眷出道南擊昌於上邽士衆乏糧臨淮公丘堆等租

於郡縣爲昌所敗昌乘勝抄掠諸將患之眷與侍御
史安頡陰謀設伏邀擊擒昌以功拜寧北將軍加散
騎嘗侍進爵源陽公後從征和龍眷督萬騎前驅降
二千餘戶尋爲假節加侍中都督豫雒二州及河內
諸軍事安南諸軍開保鎮虎牢張掖王禿髮保周之
反也徵眷與永昌王建等率衆討之破保周於番和
周遁走眷率騎追之保周窮迫自殺詔眷留鎮涼州
加都督涼沙二州諸軍事安西將軍領護羌戎校尉
轉燉煌鎮將又擊破吐谷渾俘三千餘口眷歷鎮西
藩威名並著文成時北擊伊吾尅其城大獲而還尋

拜侍中太尉進爵爲王

薛謹爲平西將軍秦州刺史時山胡白龍憑險作逆
太武詔鎮南將軍奚眷與謹自太平北入討平之除
安西將軍梧陵公

羅斤爲侍御中散從太武討赫連昌帝追奔入城昌
邀擊左右多死斤力戰有功帝嘉之錄勲除散騎嘗
侍後爲平西將軍平涼州攻城野戰多有克捷以功
賜爵帶方公

司徒楚之爲安南大將軍屯潁川宋將到彥之沂河
而西列守南岸至於衛關及彥之等退走楚之破其

別軍於長社又與冠軍將軍安頡攻滑臺拔之擒宋將朱循之季元德及東郡太守申謨俘萬餘人從征涼州以功賜隸戶一百

張黎爲鎮北將軍鎮長安太武詔黎鎮兵一萬二千人通莎泉道帝征涼州蠕蠕吳提乘虛入寇黎與司空道生拒擊走之

來大千爲征北大將軍從太武討蠕蠕戰功居多遷征北大將軍賜爵盧陵公鎮雲中兼統北道軍事賊北叛大千前後追擊莫不平殄延和初北伐大千爲前鋒大破虜軍

陸寔爲內三郎數從太武征伐所在有功宋將王玄謨衆數萬人寇滑臺寔從帝討之夜與數人乘小船突玄謨軍入城撫慰登城巡行賊營中乃還渡河至明玄謨敗走從駕至江寔再破賊軍拜建武將軍石城子還攻盱眙寔功多遷給事中

奚烏侯爲治書御史建義將軍從征蠕蠕擊赫連昌以功進爵城陽公加員外散騎嘗侍陸陵侯爲武牢鎮大將平涼休屠金崖羗狄子玉等叛以侯爲平西將軍追討崖等皆獲之

韓茂爲虎賁中郎將從太武征赫連昌大破之帝謂

諸將曰今若窮兵極武非弔伐之道明矣當共卿等
取之徙其民而還以軍功賜茂爵蒲陰子加強弩將
軍遷侍輦郎又從征統萬大破之從平涼當茂所衝
莫不應弦而殪繇是帝壯之拜內侍長進爵九門侯
從征蠕蠕頻戰大捷與樂平王丕等伐和龍徙其居
民從征涼州茂爲前鋒都將戰功居多遷司衛監錄
前後功拜散騎嘗侍殿中尚書進爵安定公從破薛
永宗蓋吳轉都官尚書從征懸瓠頻破賊軍車駕南
征分爲六道茂與高涼王那出青州諸軍渡淮降者
相繼拜茂徐州刺史以撫之

長孫陳爲羽林郎征和龍賊自西門出將犯外圍陳
擊退之追斬至其城下以功賜爵五等男
屈坦爲中領軍督諸軍東伐進號鎮東大將軍師次
和龍馮文通致牛酒以犒軍獻甲三千垣責其不送
侍子數之以王命遂掠男女六千日而還
封勅文爲鎮西將軍護西羌校尉詔勅文率步騎七
千征吐谷渾莫利延兄子拾歸於抱罕衆少不能制
詔遣安遠將軍廣川公乙烏頭等二軍與勅文會隴
右軍次武始拾歸夜遁勅文引軍入抱罕虜拾歸妻
子及其民戶分徙千家於上邽

皮豹子爲選部尚書淮陽公宋遣將裴方明等侵南秦王楊難當遂陷仇池太武徵豹子拜仇池鎮將督關中諸軍與古弼等分命諸將十道並進豹子進擊樂鄉大破之擒宋將王與之長卿等六人斬首三千餘級俘獲二千人豹子進軍下辨宋將強玄明平伯奮棄城遁走追斬之悉獲其衆宋使其秦州刺史胡崇之鎮仇池至漢中聞官軍已西懼不敢進玄明益其兵而遣之豹子與司馬楚之至於濁水擊擒崇之盡虜其衆宋將姜道祖降仇池平未幾諸氏復反推揚文德爲主宋復遣揚文德姜道盛率衆二萬人寇

水別遣將楊顯伯守斧山以距豹子濁水城兵射道盛豹子至斧山斬顯伯悉俘其衆豹子又與河間公元齊俱會于濁水賊衆震恐棄其兵甲夜遁初南秦王楊難當歸命詔送楊氏子弟詣京師文德以行賂得留亡奔漢中宋以文德爲武都王給兵一千人守葭蘆招誘氏羗於是武都陰平五部氏民叛應文德詔豹子率諸軍討之文德阻兵固險以距豹子文德將楊高來降引諸軍向其城文德棄城南走收其妻子寮屬軍資及故武都王保宗妻公主送京師宋白水太守郭啓玄率衆救文德豹子分軍逆擊大

破之啓玄文德走還漢中豹子尋爲內都大官宋遣其將殷孝祖修兩當城於清東以逼南境天水公封勅文擊之不尅詔豹子以爲南寇城守攻圍費日遂畧地至高平宋瑕丘鎮遣步卒五千助戍兩當去城八里與豹子前鋒侯騎相遇卽便交戰豹子軍繼至大破之縱騎追擊殺之至於城下其免者十餘人而已城內恐懼不敢出救旣而班師

古弼爲安西將軍鎮長安時宋遣將裴方朗等擊南秦王楊難當遣使請救兵未至難當奔上邽方明尅仇池立楊玄庶子保熾於是假弼都督隴右諸軍宋

遣其秦州刺史胡崇之屯仇池弼與平西將軍元齊邀崇之於濁水臨陣擒之其衆走還漢中弼等從祥郟山南入與東道將皮豹子等討仇池遣永安侯賀純攻宋塞狹道守將姜道祖退守狹亭諸將以山道險峻時又雪深用馬不便皆遲留不進弼獨進軍元齊賀純等繫狹亭道禪南走仇池平
尉撥文成時爲太學生募從羅忸擊賊於陳汝有功賜爵界休男從討和龍遷虎賁帥轉千人軍將又從樂平王丕討和龍除爲涼州軍將擊吐谷渾獲其人一千餘落後吐谷渾小將率三百餘落來降尋復亡

叛撥率騎追之盡獲而還以功進爵爲子獻文卽位
爲北征都將南攻懸瓠破宋將朱湛之水軍三千人
拜懸瓠鎮將
陸冥爲選部尚書時丁零數千家竊寇并定冥與并
州刺史乞伏成龍自樂平東入與定州刺史許崇之
併力討臧尋遷安西將軍長安鎮將假建平公胡賊
帥賀畧孫聚衆千餘人叛于石樓冥擊破之殺五百
餘人是時初置長蛇鎮冥率衆築城未訖而氏豪仇
儻檀等反叛氏民咸應其衆甚盛冥擊平之殺四千
餘人卒城長蛇而還

薛拔爲都將與陸冥討反仇儻檀強免生平之

勞拔爲北鎮將興光元年擊蠕蠕虜其將豆渾與句
等獲馬千餘匹

于維拔爲外都大官會隴西屠客王景文等恃險竊
命私署王侯文成詔維拔與南陽王惠壽督西州之
衆討平之徙其惡黨三千餘家於趙魏轉拜侍郎殿
中尚書

源賀爲太尉時蠕蠕寇邊賀從文成追討破之及孝
文卽位時河西勅勒叛遣賀率衆討之降二千餘落
倍道兼行追賊黨郁朱千等至抱罕大破之斬首五

千餘級虜男女萬餘口雜畜三萬餘頭復追統萬高平上邽三鎮叛勅勒至千金城斬首三千級

尉元爲鎮南大將軍獻文天安元年宋將薛安都以徐州內附元與孔伯恭赴援宋遣將張永沈攸之等率衆討安都屯于下碓永乃分遣羽林監王穆之領卒五千守輜重於武原龍驤將軍詡善居領卒二千據呂梁散騎侍郎張弘領卒二千守茱萸督上租糧供其軍實安都出城見元元依朝旨授其徐州刺史遣中書侍郎高閭李琛等與安都俱還入城別令孔伯恭精甲二千撫安內外然後元入彭城元以張永

仍據險要攻守勢倍懼傷士卒乃命安都與琛等固守身率精銳揚兵於外分擊呂梁絕其糧運善居遁奔茱萸仍與張弘東走武原馳騎追擊斬首八百餘級武原窮寇八千餘人拒戰不下元親擐甲胄四面攻之破其外營殺傷大半獲其輜重五百餘乘以給彭城諸軍然後收師緩戰開其走路穆之率餘燼奔于永軍永勢挫力屈元乘勝圍之攻其南門永遂捐城夜遁伯恭安都乘勝追擊時大雨雪泗水冰合永棄船而走元豫策永必將東亡身率衆軍邀其走路南北奮擊大破於呂梁之東斬首數萬級追北六十

餘里死者相枕手足凍斷者十八九生擒宋都督梁
南北秦三州諸軍事寧朔將軍垣恭祖羽林監沈承
伯等永攸之輕騎走免收其船車軍資器械不可勝
數

呂雒拔爲平原鎮都將宋徐州刺史薛安都歸誠請
援詔遣尉元率衆救之雒拔隨元入彭城宋將張永
遣將王茂之領兵五千入武原援其運車元遣雒拔
率騎詣武原擊之格戰二日手殺九人奪賊運車二
百餘乘牛二百五十頭仍共擊永大敗之賜爵成武
侯加建義將軍

孔伯恭爲散騎嘗侍宋徐州刺史薛安都以彭城內
附宋遣張永沈攸之等擊安都獻文遣伯恭副尉元
救之永等引師而退時皇興元年正月天大寒雪泗
水冰合永與攸之棄船而走伯恭以書喻下邳宿豫
城內時攸之吳禧公等率衆數萬來援下邳屯軍焦
墟曲去下邳五十餘里伯恭遣子都將侯分等率騎
五百在水南奚丰等五百餘騎清北邀之伯恭密造
大車攻具欲水陸俱進攸之等旣聞將戰引軍退保
樊階城伯恭又令子都將孫天慶等步騎六千向雒
中峽斫木斷清水路宋寧朔將軍陳顯達領衆二千

遡清而上以迎之屯于睢清合口伯恭率衆渡水大破顯達軍俘斬十九攸之聞顯達軍敗順流退下伯恭從睢陵城東向零中峽分軍爲二道遣司馬范師子等在清南伯恭從清西與攸之合戰遂大破之斬其將姜產之高遵世及立幼弼丘隆先沈誕沈榮宗陸道景等首攸之禧公等輕騎遁走乘勝追奔八十餘里資糧器械虜獲萬計進攻宿豫宋戍將魯僧遵棄城夜遁又遣將孔太嘗等領募騎一千南討淮陽二年以伯恭都督徐南北兖州諸軍彭城鎮將尉多侯孝文時爲假節征西將軍領護羌戎較尉延

興初蠕蠕遣部帥盧真率三萬騎入塞圍鎮多侯擊走之以功進號征西大將軍後多侯獵于南山蠕蠕遣部帥度拔入圍燉煌斷其還路多侯且前遂衝圍而入率衆出戰大破之追北數十里斬首千餘級皮喜爲南部尚書太和元年宋葭蘆戍主楊文度遣弟鼠竊據仇池詔喜率衆四萬討鼠軍到建安鼠棄城南走進次濁水遣平西將軍楊靈珍擊文度所置仇池太守楊真真衆潰僅而得免喜遂軍於覆津文度將強大黑固守津道懸崖險絕偏閣單行喜部分將士攀崖泚水衝擊大黑大黑潰走追奔西入攻葭

蘆城拔之斬文度傳首京師殺一千餘人

韋珍爲樂陵鎮將齊司州民謝天蓋自署司州刺史規欲以內附事泄爲齊將崔慧景攻圍詔珍率在鎮士馬渡淮援接時齊聞珍將至遣將苟元賓據淮逆拒珍乃分遣鐵騎於上流潛渡親率步士與賊對壘旗鼓始交鐵騎掩至腹背奮擊破之天蓋尋爲左右所殺降於慧景珍乘勝馳進又破慧景擁降民七千餘戶內徙表置城陽三郡以處之

李崇爲河南尹孝文南討漢陽以崇行梁州刺史氏揚靈珍遣弟婆羅與子雙領兵騎萬餘襲破武興與

齊相結詔崇爲使持節都督隴右諸軍事率衆數萬討之崇槎山分進出其不意表裏攻襲群氏皆棄靈珍散歸靈珍衆減大半崇進據赤土靈珍又遣從弟建率五千人屯龍門躬率精勇一萬據鷲破龍門之北數十里中伐樹塞路鷲破之口積大木聚礮石臨崖之下以拒官軍崇乃命統軍慕容拒率衆五千從他路夜襲龍門破之崇乃自攻靈珍靈珍連戰敗走俘其妻子崇多設疑兵襲尅武興齊梁州刺史陰廣宗遣參軍鄭猷王思孝率衆援靈珍崇大破之并斬婆羅首殺千餘人俘獲猷等珍走奔漢中以崇爲都

督梁秦二州諸軍事及靈珍偷據白水崇擊破之靈珍遠遁孝明初徵爲右衛將軍轉左衛將軍相州大中正魯陽蠻柳北喜魯北鷲等聚衆反叛諸蠻悉應之圍逼湖陽游擊將軍李暉先鎮此城盡力捍禦賊勢甚盛詔以崇爲使持節都督征蠻諸軍事以討之蠻衆數萬屯據形要以拒官軍崇累戰破之斬北鷲等徙萬餘戶於幽并諸州孝明追賞平氏之功封魏昌縣開國伯邑五百戶東荆蠻樊安聚衆於龍山偕稱大號梁武共爲唇齒遣兵應之諸將討擊不利乃以崇爲使持節散騎常侍都督征蠻將軍事進號鎮

南將軍率步騎以討之崇分遣諸將攻擊賊壘連戰尅捷生擒樊安進討西荆諸蠻悉降延昌初加侍中車騎將軍都督江西諸軍事時梁武遣其游擊將軍趙祖悅襲據西硤石更築外城逼徙沿淮之人於城內又遣二將昌義之王神念率水軍沂淮而上規取壽春因道龍寇邊城路長平寇五門胡興茂寇開霍揚州諸城皆被寇逼崇分遣諸將與之相持密裝船艦二百餘艘教之水戰以待臺軍梁武霍州司馬田休等率衆寇建安崇遣統軍李神擊走之又命邊城戍主邵申賢要其走路破之於濡水俘斬三千餘人

憲太后璽書勞勉許昌縣令兼紆麻戍主陳平王南引梁軍以戍歸之崇自秋請援表至十餘詔遣鎮南將軍崔亮救碭石鎮東將軍蕭寶寅於梁人堰上流決淮東注朝廷以諸將乖角不相赴乃以尚書李平兼右僕射持節節度之崇遣李神乘鬪艦百餘艘泆淮與李平崔亮合攻碭石李神水軍尅其東北外城祖悅力屈乃降朝廷嘉之進號驃騎將軍儀同三司刺史都督如故

王肅爲輔國將軍長史詔討南齊義陽肅至義陽破賊軍降者萬餘人肅遣散騎侍郎勞之以功進號

平南將軍賜駿馬一匹宣武初爲尚書令時南齊裴叔業以壽春內附拜肅使持節都督江西諸軍事車騎將軍與驃騎大將軍彭城王勰率步騎十萬以赴之齊豫州刺史蕭懿率衆三萬屯於小岷交州刺史李叔獻屯合肥將圍壽春懿遣將胡松李居士等領衆萬餘屯據死虎肅進師討擊大破之擒其將喬岷等斬首數千進討合肥生擒叔獻肅懿棄小岷南走肅還京師帝以肅淮南累捷賞帛四千七百五十匹進位開府儀同三司封昌國縣開國侯

奚康生爲中堅將軍西臺直後吐京胡反自號辛支

王康生爲軍主從章武王彬討之胡遣精騎一千邀谷斷截康生率五百人拒戰破之追至石羊城斬首三十級彬甲卒七千與胡賊戰分爲五軍四軍俱敗康生軍獨全遷爲統軍時壽春來降詔康生宣撫俄而齊將桓和屯軍梁城陳伯之據碭石民心駭動頗有異謀康生乃防禦內外音信不通固城一月援軍乃至康生出擊桓和伯之等二軍並破走之拔梁城合肥雒口三戍以功遷征虜將軍封安戎縣開國男食邑二百戶及梁將宋黑率衆寇擾彭城時康生遭母憂詔起爲別將持節假平南將軍領南青州諸軍

擊走之後梁復遣都督臨川王蕭密副將張惠紹勒甲十萬規寇徐州又假宋黑徐州刺史領衆二萬水陸俱進徑圍高塚戍詔授康生武衛將軍持節假平南將軍爲別將領羽林三千人騎步甲士隨便割配康生戰破走之

長孫百年爲抱竿領將太和中攻吐谷渾所置洮陽泥和二戍克之獲三千餘人

僧淵爲黃郭戍主太和末齊將王曇紛等萬餘人寇南青州僧淵擊破之悉虜其衆

陸叡爲北征都督擊蠕蠕大破之遷侍中都曹尚書

時蠕蠕又犯塞詔叡率騎五千以討之蠕蠕遁走追至石磧擒其帥赤阿突等數百人而還加散騎嘗侍遷尚書左僕射領北部尚書又爲使持節鎮北大將軍與楊平王蹟並爲都督領軍將軍斛律桓等北征三道諸軍事步騎十萬以討蠕蠕叡以下各賜衣物布帛孝文親幸城北訓誓群帥除尚書令衛將軍叡大破蠕蠕而還

穆亮爲都督秦梁益三州諸軍事征南大將軍領護西戎校尉仇池鎮將時宕昌王梁彌機死子彌博立爲吐谷渾所逼來奔仇池亮以彌機蕃款素著矜其

亡滅彌博凶悖氏羌所棄彌機兄子彌承戎民歸樂表請納之孝文從焉於是率騎三萬次于龍鵠擊走吐谷渾立彌承而還

楊播爲龍驤將軍與楊平王蹟等出漢北擊蠕蠕大獲而還孝文嘉其勲賜奴婢十餘口遷武衛將軍復擊蠕蠕至居延山而還除左衛將軍後爲右衛將軍從駕討崔慧景於鄧城破之進號平東將軍

劉思祖孝文朝屢爲統軍南征累著功捷宣武初爲平遠將軍任城王之圍鍾離也梁遣其冠軍將軍張惠紹及彭瓮與張豹子等率衆二萬送糧鍾離思祖

領兵數千邀梁餉軍於邵陽遣其長史元龜步騎一千於鍾離之北遏其前鋒錄事參軍繆琰掩其後思祖身率精銳橫衝其陣三軍合擊大破之擒惠紹及梁驍騎將軍祁陽縣開國男趙景悅之弟寧遠將軍景循寧遠將軍梅世和屯騎校尉任景攸長水校尉邊欣越騎校尉賈慶真龍驤將軍徐州敞等俘斬數千人

趙遐宣武景明初爲梁城戍主被梁將攻圍以固守及戰功封牟平子後以左將軍督巴東諸軍事鎮南鄭時梁冠軍將軍軍主姜循衆二萬屯羊口輔國將

軍姜白龍據南城龍驤將軍泉建率北人屯桑坪姜循又分軍據與勢司州刺史王僧炳頓南安並扇動夷僚規翻南鄭遐率甲卒所在衝擊數百里間莫不摧靡前後斬首五千餘級還正始三年九月大破梁衆於黨城桑坪梁軍合眾與司馬悅爲鎮遠將軍豫州刺史悅與鎮南將軍元英攻義陽寇之詔改梁司州爲郢州以悅爲征虜將軍郢州刺史梁遣其豫州刺史馬仙琕左軍將軍永陽戍主陳可等率衆一萬於三關南六十里因山起城名爲竹敦遣其輔國將軍濟陰太守蘇沛精兵二千

以戍之後於關南四十里麻陽舊柵起城仙理輕騎東西爲之節度關南之民多懷兩望悅令西關統軍諸靈鳳奄擊敗之盡燔其城樓儲積擒蘇沛及其輔國將軍軍主劉靈秀以散騎嘗侍徵還從征涼州以功賜隸戶一百

傅豎眼爲建武將軍鎮合肥武興民楊集義反叛推其兄子紹先爲主攻圍關城梁州刺史邢巒遣豎眼討之集義衆逆戰頻破走之乘勝追北乃尅武興後爲昭武將軍益州刺史以州初置境逼巴獠給羽林虎賁三百人進號冠軍將軍及高肇伐蜀假豎眼征

虜將軍持節領步兵三萬先討北巴梁高祖聞大軍西伐遣其寧州刺史任太洪從陰平偷路入益州北境欲擾動氐蜀以絕運路乘國諱班師遂扇誘民奄破東維徐口二戍因此詐言南軍繼至氐蜀信之翕然從逆太洪率氐蜀數千圍逼關城豎眼遣寧朔將軍成興孫討之軍次白護太洪遣其輔國將軍任碩北等率衆一千邀險拒戰在虎徑南山連置三營與孫分遣諸統隨便掩擊皆破之太洪又遣軍主遼昭等率氐蜀二千攻逼與孫柵與孫力戰爲流矢所中死豎眼又遣統軍姜喜季元度從東嶮潛入廻出西

崗邀賊之後表裏合擊大破之斬邊昭及太洪前部
王隆護首於是太洪及關城五柵一時逃散及孝明
時屢請解州乃以元法僧代之至雒拜征虜將軍大
中大夫梁遣將趙祖悅入屯硤口以逼壽春鎮南將
軍崔亮討之以豎眼爲持節鎮南軍司法僧旣至大
失民和梁遣其信武將軍衡州刺史張齊因民心怨
入寇晉壽頻陷葭萌小劔諸戍進圍州城朝廷以西
南爲憂乃驛徵豎眼於淮南旣至以爲右將軍益州
刺史尋加散騎嘗侍平西將軍假安西將軍西征都
督率騎三千以討張齊給銅印千餘須有假職者聽

六品已下板之豎眼旣出梁州冠軍將軍勾道侍梁
州刺史王太洪等十餘將所在拒塞豎眼三月之中
轉戰二百餘里甲不去身頻致大捷土民統軍席廣
度等處處邀擊斬太洪及梁征虜將軍楊伏錫等首
張齊引兵西退遂奔葭萌蜀氏聞豎眼復爲刺史人
人喜悅迎於路者日有百數豎眼至州白水以東民
皆寧業先是梁信我將軍都統白水諸軍事楊興起
征虜將軍李光宗襲據白水舊城豎眼遣虎威將軍
強虬與陰平王楊大赤率衆千餘夜渡白水旦而交
戰賊軍斬興起首尅復舊城又遣統軍傅曇表等大

破梁寧朔將軍王光昭於陰平張齊仍阻白水屯寇
葭萌堅眼分遣諸將水陸討之齊遣其寧朔將軍費
忻督步騎二千逆來拒戰軍主陳洪起力戰破之乘
勝追奔遂臨夾谷三柵統軍胡小虎四面攻之三柵
俱潰張齊親率驍勇二萬餘人與諸軍交戰堅眼命
諸統帥同時奮擊軍主許暢斬梁雄信將軍牟典祖
軍主孔領周射齊中足於是大破賊軍斬獲甚衆齊
乃柵於虎頭山下賊帥任令崇屯據西郡堅眼復遣
討之令崇棄衆夜遁乃進討齊破其三柵斬首萬餘
齊被重創奔竄而退小劔大劔賊亦捐城西走益州

平

田益宗爲征虜將軍宣武景明初梁遣軍主吳子陽
率衆寇三關益宗遣光城太守梅與之步騎四千進
至陰關南八十餘里據長風城逆擊子陽大破之斬
獲千餘級梁建寧太守黃天錫築城赤亭復遣其黃
公賞屯於崇城與風相持益宗命安蠻太守梅景秀
之掎角擊討破天錫等斬首數百獲其二城後梁寧
朔將軍楊僧遠率衆二千寇逼蒙龍益宗命魯生與
戍主奇道顯逆擊破之追奔十里俘斬千餘進號平
南將軍

楊大眼爲征虜將軍東荊州刺史景明中蠻酋樊秀安等反詔大眼爲別將隸都督李崇討平之後遷平南將軍持節都統軍正始中梁遣其前江州刺史王茂先率衆數萬次于樊雍招誘蠻夏規立宛州又令其所署宛州刺史雷豹狼軍主曹仲宗等領衆二萬偷據河南城宣武以大眼爲武衛將軍假平南將軍持節都督統軍曹敬邴蚪樊魯等諸軍討茂先等大破之斬梁輔國將軍王花龍驤將軍申天化俘馘七千有餘梁又遣其勇將張惠紹總率衆軍竊據宿豫又假大眼平東將軍爲別將與都督邢巒討破之

薛真度景明中爲平南將軍時梁豫州刺史王超宗率衆圍逼小峴真度遣兼統軍李叔仁等率步騎擊之超宗逆來拒戰叔仁擊破之俘斬三千還朝除金紫光祿大夫加散騎嘗侍

魏承祖爲右將軍善撫士卒兼有將材自宣武景明以後嘗爲統軍南北征伐累有戰功歷太原太守至光祿大夫

陳伯之爲冠軍將軍正始初梁征虜將軍趙祖悅築城於水東與潁川接對置兵數千欲爲攻討之計伯之進軍討祖悅大破之乘勝長驅入城刺祖悅三創

賊衆大敗進討破賊諸郡斬獲數千
刃整爲尚書左中兵郎中正始中梁江州刺史王茂
先來寇南境平南將軍楊大眼討之詔整持節爲大
眼軍司大破茂先斬梁輔國將軍王花等永平初以
軍功除員外散騎嘗侍
畢祖朽爲寧遠將軍正始中梁將蕭及先率步騎二
萬人寇兖州及先令別帥角念屯于蒙山以祖朽爲
統軍假寧朔將軍隸邢巒討之祖朽開誘有方降者
相繼賊出逆戰祖朽大破之賊走還柵祖朽夜又焚
擊賊徒潰散追討百餘里斬獲及赴沂死者四千餘

人斬龍驤將軍矯道儀寧朔將軍王秀以功封南城
縣開國男食邑二百戶

李世哲爲三關別將延昌三年大破羣蠻斬梁龍驤
將軍文思之文天生

李煥爲輔國將軍梁州刺史時武興氏楊集起舉兵
作逆令弟集義邀斷白馬戍勅假煥平西將軍督別
將石長樂統軍王祐等與軍司苟金養俱討之大破
集起軍會秦州民呂苟兒反煥仍令長樂等緣麥積
崖赴援州屬都督元麗至遂共平之時氏王楊定進
猶據方山與苟兒影響煥密募氏趙芸路斬定

邢巒爲尚書時梁朝梁秦二州行事夏侯道遷以漢中內附詔加巒使持節都督征梁漢諸軍事假征西將軍進退徵攝得以便宜從事巒至漢中白馬巴西猶未歸順巒遣寧遠將軍楊舉統軍楊衆愛汎洪雅等領卒六千討之軍鋒所臨賊皆款附唯祖谷成主何法靜據城拒守舉等進師討之法靜奔潰乘勝追至關城之下梁龍驤將軍關城流雜李侍叔逆以城降梁輔國將軍任僧幼等三十餘將率南安廣長東維大寒武始除口平溪留谷諸郡之民七千餘戶相繼而至梁平西將軍李天錫晉壽太守王景等擁衆

七千屯據石亭統軍韓多寶等率衆擊之破天錫前將軍趙賄擒斬一千三百遣統軍李義珍討晉壽王景霄遁遂平之拜巒使持節安西將軍梁秦二州刺史梁巴西太守龐景民恃遠不降巒遣巴州刺史嚴玄思往攻之斬景民巴西悉平梁遣其冠軍將軍孔陵等率衆二萬屯據深坑冠軍將軍曾方達固安南冠軍任僧褒輔國將軍李暎戍石同巒統軍王足所在擊破之梟將輔國將軍樂保明寧朔將軍李伯度龍驤將軍李思賢賊遂堡廻軍柵足又進擊梁輔國將軍范峻自餘斬獲殆將萬數孔陵等收集遺衆奔

堡梓潼足又破之斬梁輔國將軍符伯度其殺傷投溺者萬有餘人開地定民東西七百南北千里獲郡十四二部護軍及諸縣戍後爲安東將軍先是梁輔國將軍蕭及先率衆二萬寇陷固城冠軍將軍魯顯文驍騎將軍桓文玉等率衆二萬屯於孤山梁將角念等率衆一萬擾亂龜蒙土民從逆十室而五巒遣統軍樊魯討文玉別將元嘗攻固城統軍畢祖朽討用念樊魯大破文玉等追奔八十餘里斬首四千餘級元嘗又破固城畢祖朽復破念等兗州悉平巒破賊將藍懷恭於睢口進圍宿豫而懷恭等復清南造

城規斷水陸之路巒身率諸軍自水南而進遣平南將軍楊大眼從水北逼之統軍劉思祖等夾水造筏燒其船舫衆軍齊進拔柵填塹直登其城火起中流四面俱擊乃陷賊城俘斬數萬在陣別斬懷恭擒其列侯列將直閣直後三十餘人俘斬一萬宿豫旣平蕭昞亦於睢陽退走二戍獲米四十餘萬石後豫州城民白早生殺刺史司馬悅以城南入詔巒持節討之巒率騎八百倍道兼行五日次於鮑口賊遣大將軍胡孝智率衆七千去城二百逆來拒戰巒擊破孝智乘勝長驅至於懸瓠賊出城逆戰又大破之因卽

渡汝既而大兵繼至遂長圍之詔加巒使持節假鎮南將軍都督南討諸軍事征南將軍中山王英南討三關亦次於懸瓠以後軍未至前寇稍多憚不敢進乃與巒分兵犄角攻之梁將齊苟仁等二千人開門出降卽斬早生等同惡數十人豫州平

裴良以尚書左丞爲西北道行臺討汾州羣胡薛羽等值別將李德龍爲羽所破良入汾州與刺史汝陰王景和及德龍率兵數千人憑城自守賊併力攻逼詔遣行臺裴廷雋大都督章武王融都督宗王彌孫等赴援時有五城郡山胡馮宜都賀悅廻成等以妖

妄惑衆假稱帝號服素衣持白傘白幡率諸逆衆於靈臺郊抗拒王師融等與戰敗績賊乘勝圍城良率將士出戰大破之於陣斬廻成

李平爲鎮北將軍討京兆王愉於冀州平至城南十六里賊攻圍濟州軍板柵填塹未滿者數尺諸將合戰無利而還憚於更進平親入行間勸以重賞士卒乃前大破逆衆愉時墜馬乃有一人下馬援愉上而鬪死乘勝逐北至於城門斬首數萬級遂圍城燒門愉與百餘騎突門出走遣統軍叔孫頭追之去信都八十里擒愉冀州平後遷鎮軍大將軍率步騎二千

以赴壽春平巡視硤石內外知其盈虛之所嚴勒崇亮憚之無敢乖互頻日交戰屢破賊軍安南將軍崔延伯立橋於下蔡以拒賊之援軍賊將王神念昌義之等不得進救趙祖悅守死窮城平乃分部攻之令崔亮督陸卒攻其城西李崇勒水軍擊其東面然後鼓噪南北俱上賊衆周章東西赴戰屠賊外城賊之將士相率歸附祖悅率其餘衆固保南城通夜攻守至明乃降斬祖悅送首於雒俘獲甚衆

冊府元龜

冊府元龜

淮南李嗣京參閱

西極文翔鳳訂正

豫章黃國琦較釋

將帥部 一十五

立功第七

後魏崔亮孝明初爲撫軍將軍定州刺史梁左游擊將軍趙祖悅率衆偷據硤石詔亮假鎮南將軍齊王蕭寶寅鎮東將軍章武王融安南將軍並使持節都督諸軍事以討之靈太后勞遣亮等賜戎器雜物亮

至硤石祖悅出城逆戰大破之賊復於城外置三柵
欲拒官軍亮焚擊破之殺三千餘人亮與李崇為水
陸之期日日進攻而崇不及李平至乃進軍共平硤
石

崔孝芬為龍驤將軍時荊州刺史李神雋為梁遣將
攻圍詔加孝芬通直散騎嘗侍以將軍為荊州刺史
兼尚書南道行臺領軍司率諸將以援神雋因代焉
於時州郡內戍悉已陷沒且路繇三鵝賊已先據孝
芬所統既少不得徑進遂從弘農堰渠山道而入遣
弟孝直輕兵在前出賊不意賊便奔散人還安堵孝

明嘉勞之并賫馬及綿絹等物孝昌三年梁將成勳
雋率眾逼彭城除孝芬寧朔將軍率大都督李叔仁
柴集等赴戰景雋等力屈退走永安二年莊帝聞元
顥有內侵之計勅孝芬南赴徐州顥遂潛師向考城
擒大都督濟陽王暉業乘勝徑進遣其後軍都督侯
暄守梁國城以為後援孝芬勒諸將馳往圍暄恐顥
遣援乃急攻之晝夜不息五日暄遂突出擒斬之俘
其卒三千餘人
源子雍為夏州刺史會破落汗披陸首為反亂北海
王顥為大行臺子雍具陳賊可滅之狀顥給子雍兵

馬令其先行時東夏合境反叛所在屯結子雍轉聞
而前九旬之中凡數十戰乃平東夏徵稅租粟於統
萬城於是二夏漸寧及蕭寶寅等爲賊所敗賊帥宿
勒明達遣息阿非率衆邀路華州白水被圍逼關右
騷擾咫尺不通時子雍新平黑城遂率士馬并夏州
慕義之民攜家席卷鼓行南出賊帥康維摩率羗
胡守鋸谷斷魏棠橋子雍與交戰大破之生擒維摩
又攻賊帥契官斤於楊氏堡破之子雍出自西夏漸
至於東轉戰千里至是朝廷始得其委問加散騎嘗
侍使持節假撫軍將軍都督兼行臺尚書復破賊帥

紇單步胡提於曲沃堡孝明璽書勞勉之子雍在白
水郡復破阿非軍於白水郡多所斬獲詔遣侍中尚
書令城陽王徽於潼關宣旨慰勞

李苗爲西北道行臺與大都督宗正珍孫討汾絳蜀
賊平之還除司徒司馬

崔延伯爲征西將軍時莫折念生兄天生下隴東寇
征西將軍元志爲天生所擒賊衆甚盛進屯黑水詔
延伯爲使持節征西將軍西道都督與行臺蕭寶寅
討之與延伯結壘馬嵬南北相去百餘步寶寅日集
督將論討賊方畧延伯每云賊新制勝難與爭鋒寶

寅正色責之曰君荷國寵靈總戎出討便是安危所繫每云賊不可討以示怯懦損威挫氣乃君之罪延伯明晨詣寶寅自謝仍云今當仰爲明公參賊勇怯延伯選精兵數千下渡黑水列陣西進以向賊營寶寅率衆於水東尋原西北以示後繼於時賊衆大盛水西一里營連接延伯徑至賊壘揚威脇之徐而還退賊以延伯衆少開營競追衆過十倍臨水逼蹙寶寅親觀之懼有虧損延伯不與戰身自殿後抽衆東渡轉運如神須臾濟盡徐乃自渡賊徒奮氣相率還營寶寅大悅謂官屬曰崔公古之關張也今年何患

不制賊延伯馳見寶寅曰此賊非老奴敵公但坐看後日延伯勒衆而出寶寅爲後拒天生悉衆來戰延伯中令將士身先士卒陷其前鋒於是勇銳競進大破之俘斬十萬餘追奔及於小隴秦賊勁強諸將所憚朝廷初議遣將咸云非延伯無以定之果能尅敵授左衛將軍

嘗景爲左將軍徐州刺史杜雒周反於燕州乃以景兼尚書爲行臺與幽州都督平北將軍元譚以禦之景表求勒幽州諸縣悉入古城山路有通賊之處權發兵夫隨宜置戍以爲防遏又以頃來羗兵不盡強

壯今之三長皆是豪門多丁為之今求權發為兵帝皆從之進號平北將軍別勅譚西至軍都關北從盧龍塞據此二嶮以杜賊出入之路又詔景遣州山中嶮路之處悉令捍塞景遣府錄事參軍裴智成發范陽三長之兵以守白峒都督元譚據居庸下口俄而安州石離宛城解鹽三成兵反結維周有眾二萬餘自松岍赴賊譚勒別將崔仲哲等截軍都關以待之仲哲戰沒洛周又自外應之腹背受敵譚遂大敗諸軍夜散詔以景所部等將李琚為都督代譚征下口降景為後將軍解州任仍詔景為幽安玄等州行臺

賊既南出鈔掠薊城景命統軍梁仲禮率兵士邀擊破之獲賊將禦夷鎮軍主孫念嘗都督李琚為賊所攻薊城之北軍敗而死率屬城人禦之賊不敢逼維周還據上谷授景平北將軍光祿大夫行臺如故維周遣其都督王曹紇真馬叱斤等率眾薊南以掠人穀乃遇連雨賊眾疲勞景與都督于榮刺史王延年置兵粟國邀其走路大敗之斬曹紇真維周率眾南趣范陽景與延年及榮復破之又遣別將重破之於州西彪眼泉禽斬之及溺死者甚眾

一云景破杜洛周斬其武川王

賀拔文典別帥侯莫陳升生擒男女四百口牛馬五千餘頭

楊昱爲東南道都督時泰山太守羊侃據郡南叛梁遣將軍王辯率衆侵寇徐州番郡人續靈珍受梁平北將軍番州刺史擁衆一萬攻逼番城昱遣別將劉馘擊破之臨陣斬靈珍首王辯退走

李暉爲中散大夫正光二年南荊州刺史桓叔興驅掠城民叛入于梁梁資以兵糧令築谷陂城以立雒州逼土山戍詔暉持節兼尚書左丞爲行臺督諸軍討叔興大破之乘勝拔谷陂叔興退走軍還除尚書右丞

源子恭爲冠軍將軍正光中秦益氏反詔子恭持節爲都督河間王琛軍司以討之事平仍行南秦州事後加後將軍平絳蜀及丹谷清廉二路阻澁不通以子恭爲當郡別將俄而建興蜀復反相與連勢進子恭爲持節散騎嘗侍假平北將軍征建興都督仍兼尚書行臺與王平政都督長孫雅合勢進討大破之正平賊帥范明達與賊帥劉牙奴並面縛請降武泰初郢州刺史元願達以城降梁詔徵都督尉慶賓還京師廻衆隸子恭以討之梁將夏侯夔率衆數萬來寇復以城降梁遠近不安夔乘勢分兵遂逼新蔡白攻毛城子恭隨方應援賊並破走梁豫州刺史夏侯

曾復遣四將率衆三萬圍南頓北攻陳項子恭遣軍禦之賊復奔退梁直閣將軍軍主胡智達等八將與其監軍闕次洪入寇於州城東北四十餘里子恭擊破之斬智達生擒次洪板橋蠻文石活石忌麤受梁印節扇誘黨類據險寇竊子恭躬率將士徑襲其柵數日之中殲殪畧盡後叛蠻雷亂清受梁兗州刺史綬入爲寇掠諸蠻從之置立郡縣子恭討平之

蕭寶寅爲鎮東將軍都督東南楊徐兗三州諸軍事賊將姜慶真內侵圍逼壽春遂據外郭寶寅躬貫甲胄率衆力戰破走之後爲車騎大將軍都督徐州東

道諸軍事正光末梁遣其將裴邃虞鴻等率衆寇揚州詔寶寅率諸將討之旣而揚州刺史長孫稚大破邃軍斬鴻賊遂奔退初秦州城人薛珍劉慶杜遷等反執刺史李彥稚莫折大提爲首自稱秦王大提尋死其弟四子念生竊號改年置立官寮遣其弟天生率衆出隴東攻沒汧城陷岐州執元志裴芬之等遂寇雍州屯於黑水朝廷甚憂之乃除寶寅開府西道行臺所部西征寶寅與大都督崔暹伯擊天生大破之斬獲十餘萬仍進討高平賊帥万俟醜奴於安定更有負捷時有天水人呂伯度兄弟始共念生同逆

後與兄衆保于顯親聚衆討念生戰敗降於胡琛琛以伯度爲大都督秦王資其士馬還征秦州大敗念生將杜粲於成紀又破其金成王莫折普賢於水維城遂至顯親念生率衆身自拒戰又大奔敗伯度乃背胡琛襲琛將劉拔破追之遣其兄子忻和率騎東引國軍念生事逼乃詐降於寶寅朝廷喜伯度立義之功授撫軍將軍涇州刺史平秦郡開國公食邑三千戶孝昌二年除侍中驃騎大將軍寶寅初自黑水終至平原與賊相對數年攻擊賊亦憚之關中保全寶寅之力矣

裴衍爲征虜將軍孝昌初梁將曹景宗寇荊州山蠻應之大路斷絕都督崔暹率數萬之衆盤桓魯陽不能前討荊州危急朝廷憂之詔衍爲別將假前將軍與弘農太守王羆率軍一萬出武關以救荊州賊逆戰於析陽衍大破之賊遂退走荊州圍解費穆爲平南將軍孝昌中妖賊李洪於陽城起逆連結蠻左詔穆兼武衛將軍率衆討擊破於關口之南遷金紫光祿大夫武衛將軍李神軌爲武衛將軍相州刺史安相王鑒據州反詔神軌與都督源子邕等討平之武泰初蠻帥李洪扇

動諸落伊闕已東于鞏縣多被燒劫詔神軌爲都督
與寧朔將軍崔孝暉持節討平之
爾朱榮爲游擊將軍蠕蠕主阿那瓌寇掠北鄙詔假
榮節冠軍將軍別將隸都督李崇北征榮率其所部
四千人過擊度磧不及而還秀容內附胡民乞扶莫
干破郡殺太守南秀容牧子萬子乞真反叛殺太僕
卿陸延并州牧子素和婆喻嶮作逆榮並前後討平
之遷直閣將軍冠軍將軍仍別將內附叛胡乞步落
堅胡劉阿如等作亂瓜肆勅勒北列步若反於沃嗚
榮並滅之以功封安平縣開國侯食邑一千戶尋加

通直散騎嘗侍勅勒斛律維陽作逆桑乾西與賈也
頭牧子迭相犄角榮率騎破維陽於深井遂牧子於
河西孝莊建議初北海王顥南奔于梁時邢杲寇亂
三齊與顥應接顥都督宗正珍孫河內太守元襲固
守不降榮攻而尅之斬珍孫元襲以徇帝幸河內城
榮與顥相持於河上顥令都督安豐王延明緣河據
守榮旣未有舟楫不得卽渡議欲還北更圖後舉黃
門郎楊保高道穆等並謂大軍若還失天下之望固
執以爲不可屬會馬渚諸楊云有小船數艘求爲鄰
導榮乃令都督爾朱兆等率精騎夜濟登岸奮擊顥

十領軍將軍寇受率馬步五千拒戰兆大破之臨陣擒寇受延明聞寇受見擒遂自逃散顯便率麾下南奔後遷天柱大將軍還晉陽先是葛榮枝黨韓婁仍據幽平二州榮遣都督侯淵討斬之時賊帥万俟醜奴蕭寶寅擁眾幽涇克勢日盛榮遣其從子天光爲雍州刺史率都督賀拔岳侯莫陳悅等總眾入關討之天光旣至雍州以眾少不敵逡巡未進榮大怒遣其騎兵參軍劉貴馳驛諸軍加天光杖罰天光等大懼方進討連破之擒醜奴寶寅並盤車送關門天光又擒王慶雲万俟道樂關西悉平於是天下大難使以盡矣

賈顯度孝莊時爲統軍將軍從上黨王天穆破邢杲元顥大樂仍與天穆渡河起行官於河內顥平以本將軍除廣州刺史

樊子鶴爲平北將軍元顥入維薛修義及絳蜀陳雙熾等受顯處分率眾攻州城子鶴出與戰大破之又破修義於土門以功拜撫軍將軍後兼右僕射爲行臺督賈智等討呂文欣於東徐州平之出帝大昌初兼尚書左僕射東南道大行臺總大都督杜德等追討爾朱仲遠仲遠奔梁收其兵馬甲仗時梁遣元樹

入寇陷據譙城詔子鵠與德討之樹兵梁園欲來逆戰見子鵠軍盛夜退還譙子鵠引兵追躡樹又背城為陣子鵠勒兵直趨城下縱騎衝突樹眾大敗奔入城門城閉隘塞多自殺害於是斬千餘級獲馬數百匹大收鎧仗遂圍城

鹿念為給事黃門郎及東徐城民呂文欣殺刺史元大賓南引賊眾屯柵曲術詔念使持節散騎嘗侍安東將軍為六州刺史與行臺樊子鵠討破文欣之黨重以購之文欣同逆人韓端正斬文欣送首魁帥司死者十二人詔書褒慰

侯淵為驃騎將軍前廢帝立幽州刺史劉靈助舉義兵屯於安國城淵與叱列延慶等破擒之

崔孝直後廢帝時為寧遠將軍汝南王開府掾領直寢兄孝芬除荊州詔孝直假征虜將軍別將總羽林二千騎與孝芬俱行孝直潛師徑進賊遂破走孝芬入城後梁將曹義宗仍在馬圍鼓動順陽蠻夷緣邊寇竊孝直率眾禦之賊皆退散

東魏鄭模為安東將軍万俟醜奴遣將郝虎南侵模攻破其營擒虎以功封槐里縣開國伯邑五百戶鄭尚為統軍東西征討以軍功賜爵汝陽男

高元盛爲衛將軍天平四年滎陽人張儉等聚衆反於大魏山通西魏元盛討破之

賀拔仁爲大都督天平四年十二月河間人邢磨納范陽人盧仲禮等各聚衆反元象元年九月拔仁擊破平之

北齊慕容儼初仕魏正光中爲河間王元琛左廂軍主率衆救壽春以戰功賞帛五十匹軍次西碛石因解渦陽之圍平倉陸城荆山戍梁遣將鄭僧等要戰儼擊之斬其將蕭喬梁人奔遁又襲破王神念等軍擒二百餘人神念僅以身免三年梁遣將攻東豫州

詔遣大都督元寶掌討之儼爲別將鄭海珍與戰斬其軍主僧珍軍副秦太又擊賊王苛於陽夏平之孝昌中爾朱榮入洛授儼京畿南面都督永安中又破梁將馬元達蔡天起柳自嘉等累有功除強弩將軍與梁將王玄真董當門等戰並破之解穰城圍尅復南陽新鄉轉積射將軍持節豫州防城大都督高祖時爲鎮南將軍鎮河橋五城侯景叛儼擊陳郡賊獲景麾下庫狄何賴及僞署太守鄭道合兗州刺史王彥夏行臺狄暢等擒斬百餘級旋軍項城又擒景僞署刺史辛光弁及蔡遵并其部下二千人除譙州刺

史屢有戰功多所降下

高市貴初仕後魏孝昌初鎮州內都勅勒劉胡倫等聚衆反市貴爲都督率衆討倫一戰破之累遷撫軍將軍諫議大夫及爾朱榮立莊帝市貴預翼戴之勳遷衛將軍光祿大夫秀容大都督第一領民酋長賜爵上維縣伯爾朱榮擊葛榮於滏口以市貴爲前鋒都督葛榮平除使持節汾州刺史後遷驃騎大將軍高祖起義市貴預其謀及樊子鵠據州反隨大都督婁昭討之子鵠平除西兗州刺史高祖以洪峒要險遣市貴鎮之高祖沙苑失利晉州行事封祖業棄城

而道州民柴覽聚衆作逆高祖命市貴討之覽奔柴壁市貴破斬之是時東雍南汾二州境多羣聚爲盜因市貴平覽皆散歸復業後秀容人五千戶叛應山胡復以市貴爲行臺統諸軍討平之

叱列平代郡西部人世襲第一領軍酋長魏孝昌末拔陸反叛茹茹餘衆入寇馬邑平以統軍屬有戰功補別將後牧子作亂劉胡倫斛律可那律俱時構逆以平爲都督討定胡倫等魏孝莊初除武衛將軍隨爾朱榮破葛榮平元顥達中軍都督右衛將軍封瘦陶縣伯邑七百戶榮死平與榮妻及爾朱世隆等北

走長廣王暉立授右衛將軍加京畿大都督
李渾仕後魏爲散騎嘗侍普泰中崔社客反於海岱
攻圍青州詔渾爲征東將軍都官尚書行臺赴援而
社客宿將多謀諸城各自保固堅壁清野將議有異
同渾曰社客賊之根本圍城復踰晦朔烏合之衆易
可分離若簡練驍勇銜枚夜襲徑趣營下出其不意
咄嗟之間便可擒殄如社客就擒則諸郡可傳檄而
定何意冒熱攻城疲損軍士諸將遲疑渾乃決行未
明達城下賊徒驚散生擒社客斬首送洛海隅清定
斛律羨舉仕魏爲大都督潁川人張儉聚衆反叛西

逼關右羨舉隨都督侯景高昂等討平之

薛修義任魏爲關右行臺樊子鵠之據交州修義從
大司馬婁昭破平之後爲衛尉卿山胡侵亂晉州遣
修義追討破之

王琳初仕梁爲建寧縣侯侯景遣將朱子仙據郢州
琳攻尅之擒子仙又隨王僧辯破景後拜湘州刺史
平景之勳與杜龕俱爲第一梁王蕭譽旣爲陳霸先
所殺王僧辯推立敬帝以侍中司空徵琳不從命乃
大營樓艦將圖義舉琳將張平宅乘一艦每將戰艦
以千數以野猪爲名陳武帝遣將侯安都周文育等

誅琳仍受梁禪安都嘆曰我其敗乎師無名矣逆戰於沌口琳乘平肩輿執鉞而麾之擒安都文育其餘無所漏唯以周鐵虎一人背恩斬之鑠安都文育寘琳所坐艦中令一闔監監守之

堯雄初仕魏爲宣威將軍從叱列延討劉靈助平之拜鎮東將軍燕州刺史及高祖義旗初建以爲車騎大將軍瀛州刺史武帝入關雄爲大都督隨高昂破賀拔勝於穰城周宣征討三荆仍除二豫楊郢四州都督豫州刺史及梁以元慶和爲魏王侵擾南境雄率衆討之大破慶和於南頓尋與行臺侯景破梁楚

豫州民上書更乞雄爲刺史復行豫州事隨行臺任延敬討賀若徽于潁州延敬等失利雄收集散卒保大梁周文帝因延敬之敗遣右丞韋孝寬等攻豫州雄都督郭丞伯程多寶等舉豫州降敵雄外兵參軍王嘗伽等從大梁逃斬多寶西魏以丞伯爲潁川太守雄仍與行臺侯景討之雄別攻破樂口擒丞伯進討懸瓠逐西魏刺史趙繼宗韋孝寬等復以雄行豫州事

任延敬初仕西魏爲徐州刺史潁川長史賀若徽執刺史田迅據城降魏復令延敬率豫州刺史堯雄等

討之魏遣其將怡峯率衆來援延敬等與戰失利收還北豫仍與行臺侯景司徒高昂等相會共攻潁川拔之

斛律金初仕東魏爲汾州大都督從高祖破紇豆陵於河西元象中與行臺薛脩義共圍喬山之寇俄而高祖至仍共討平之因從高祖攻下南絳邵郡等數城武定初北豫州刺史高仲密據城西叛周文帝入寇雒陽高祖使金統劉豐步大汗薛等步騎數萬守河陽城以拒之高祖到仍從破定軍還除大司馬改封石城郡公邑一千戶轉第一領民酋長三年高祖

出軍襲山胡分爲二道以金爲南道軍司絲黃檀嶺出高祖自出北道度赤嶺會金於烏突戍合擊破之軍還出爲冀州刺史四年詔金率衆從烏蘇道會高祖於晉州仍從攻玉壁軍還高祖使金總督大衆從歸晉陽後爲肆州刺史高祖詔金率衆會攻潁川事平復使金率軍從嶧坂送米宜陽西魏九曲戍將馬紹隆據險要闚金破之以功別封安平縣男後遷太師文宣天保中茹茹爲突厥所破種落分散慮其犯塞驚擾邊民乃詔金率騎三萬屯白道以備之而虜帥豆婆吐久備將三千餘戶密欲西過候騎還告

金勒所部追擊盡俘其衆茹茹但針將舉國西徙金
獲其候騎送之并表陳虜可擊取之勢顯祖於是率
衆與金共討之於吐賴獲二萬餘戶而還進位右丞
相

李愬東魏時爲南荊州大都督時梁遣南司州刺史
任思祖隨郡太守桓和等率馬步三萬兼發邊蠻圍
逼下澧戍愬躬自討擊之詔加車騎將軍

慕容紹宗魏末從爾朱榮以軍功封索盧縣侯後高
祖破羊侃又與元天穆平那朶累遷并州刺史後爲
豫州刺史西魏將獨孤如願據雒州梁頴之間寇盜

蜂起高祖命紹宗率兵赴武牢與行臺劉貴等平之
進爵爲公還朝遷御史中尉屬梁人劉烏黑入寇徐
方令紹宗率兵討擊之大破因除徐州刺史烏黑收
其散衆復爲侵竊紹宗密誘其徒黨數月間遂執烏
黑殺之侯景反叛命紹宗爲東南道行臺加開府轉
封燕郡公與韓軌等詣瑕丘以圖進趣梁武帝遣其
兄子貞陽侯淵明等率衆十萬頓軍寒山與侯景椅
角擁泗州灌彭城仍詔紹宗爲行臺節度三徐二兗
軍事與大都督高岳等出討大破之擒蕭明及其將
帥等俘獲甚衆乃回軍討侯景於渦陽于時景軍甚

衆前後諸將往者莫不爲其所輕及聞紹宗與岳將至深有懼色謂其屬曰岳所部兵精紹宗舊將宜共慎之於是與景接戰諸將持疑無肯先者紹宗麾兵徑進諸將從之因而大捷景遂奔遁軍還別封永樂縣子

范舍樂初爾朱兆爲都督高祖義舉棄兆歸信都從高祖破兆於廣阿韓陵並有功賜爵平舒男每從征役多有克捷除相府左廂大都督

敬顯携初爲高祖別駕及義舉以携爲行臺倉部郎中從攻鄴令顯携督造土山城拔又從平西胡轉都

都官尚書與諸將征討累有功又從高祖平寇難破周文帝敗景平壽春定淮南又畧地三江口多築城戍累除兖州刺史

段韶爲高祖親信都督從帝出晉陽追爾朱兆於赤嶺嶺平之以軍功封平維縣男後遷武衛將軍周宇文護母閻氏先配中山宮護聞閻尚存乃因邊境移書請還其母并通隣好文襄許之護得其母乃遣將尉遲迥等襲維陽韶與蘭陵王長恭大將軍斛律光率衆擊之韶且將帳下三百騎與諸軍共登邳阪聊觀周軍形勢至太和谷便值周軍卽遣馳告諸營追

集兵馬仍與諸軍結陣以待左軍蘭陵王爲中軍斛
律光爲右軍與周人相對韶遙謂周人曰汝宇文護
幸得其母不能懷恩報德今日之來竟何意也周人
曰天遣我來有何可問韶曰天道賞善罰惡當遣汝
送死來耳周軍乃以步人在前上山逆戰韶以彼徒
我騎且却且引待其力敝乃下馬擊之短兵始交周
人大潰其中軍所當者亦一時瓦解投墜溪谷而死
者甚衆雒城之圍亦卽奔遁盡棄營幕從邛山至谷
水三十里中軍資器物彌滿川澤車駕幸雒陽親勞
將士於河陰置酒高會策勳命賞除太宰封武陵縣

公天保中梁將東方白額潛至宿豫招誘邊民殺害
長吏淮泗擾動詔徵韶討之旣至會梁將嚴超達等
軍逼涇州又陳武帝率衆將攻廣陵刺史王敬寶遣
使告急復有尹思令衆萬餘人謀襲盱眙三軍咸懼
韶謂諸將曰自梁氏喪亂國無定主人懷去就強者
從之霸先等智小謀大政令未一外託同德而內有
離心諸軍不足憂吾揣之熟矣乃留儀同敬顯携堯
難小等圍守宿豫自將步騎數千人倍道赴涇州塗
山盱眙思令不虞大軍卒至望旗奔北進與超達合
戰大破之盡獲其舟艦器械謂諸軍士曰吳人輕躁

本無大謀今破超達霸先必走卽回赴廣陵陳武帝果遁去追至楊子柵望揚州城乃還大獲其軍資器物旋師宿豫六月詔遣辯士喻白額禍福白額於是開門請盟韶與行臺辛術等議且爲受盟盟訖度白額終不爲用因執而斬之并其諸弟等並傳首京師江淮帖然民皆安輯顯祖嘉其功詔賞吳口七十人封平原郡王

蔡雋初仕魏從高祖爲都督隨領軍婁昭攻樊子鵠於兗州又與行臺元子思討元慶和俱平之侯深反復以雋爲大都督率衆討之深敗走

庫狄迴錐爲高祖右廂都督從征山胡先鋒斬級除朔州刺史破周文於河陽轉授夏州刺史邛山之役力戰有功增邑通前七百戶

王則爲征南將軍從行臺侯景周旋征討屢有功績暴顯東魏時爲征南將軍廣州刺史武定二年侯景反於河南爲景所攻顯率左右百餘騎突出賊營拔河南歸國時高岳慕容紹宗等卽配顯士馬隨岳等破景於渦陽三年與清河王高岳襲歷陽取之爲賊貨解鄭州大理禁止處斷未訖爲合肥被圍遣與步汗薩慕容儼等同攻梁北徐州擒刺史強梁秦州刺

史巖超遠戰於涇城破之五年授儀同三司又與高岳臨漢水攻下梁西楚州獲刺史許法光

薛震爲廣州刺史從慕容紹宗討侯景以功別封膚

施縣男文宣天保四年從討山胡破茹茹並有功績

累遷譙州刺史

杜弼文襄時爲中軍大將軍破蕭明於塞山別與領

軍潘樂攻拔梁潼州仍與樂等撫軍恤民合境傾賴

斛律平爲肆州刺史周太祖遣其右將軍李小光據

梁州平以偏師討擒之出爲燕州刺史入兼左衛將

軍領衆一萬討北徐賊破之

綦連猛文宣天保元年爲都督東秦州刺史隨斛律

敦北征茹茹敦令猛輕將百騎深入覘候還至白道

與軍相會因此追躡遂大破之賫帛三百段皇建初

爲左右大將軍從孝昭討奚賊大捷獲馬二千疋牛

羊三萬頭

盧潛天保中爲南討經畧陳秦譙二州刺史王奉國

合州刺史周令珍前後入寇潛輒破平之以功加散

騎嘗侍

斛律光天保中爲左衛將軍從征出塞光先驅破敵

多斬首虜并獲雜畜還除晉州刺史後遷衛將軍河

清三年周將達奚成興等來寇平陽詔光率步騎三萬禦之興等聞而退走光逐北遂入其境獲三千餘口而還遷司徒左衛將軍其年周遣柱國大司馬尉遲迥齊國公宇文憲柱國庸國公可北雄等衆稱十萬寇維陽光率騎五萬馳往赴擊戰於却山迥等大敗光親射雄殺之斬捕首虜三千餘級迥憲僅而獲免盡收其甲兵輜重仍以死者積爲京觀世祖幸維陽策勲班賞遷太尉又封冠軍縣公後主天統三年十二月周遣將圍維陽壅絕糧道武平元年正月詔光率步騎三萬討之軍次定陶周將張掖公宇文榮

忠州刺史梁士彥開府司水大夫梁景興等又屯鹿盧交道光擐甲執銳身先士卒鋒刃纒交衆大潰斬首三千餘級直到宜陽與周齊國公宇文憲申國公掄跋顯敬相對一旬光置築統開豐化二城以通宜陽之路軍還行次安業憲等衆號五萬乃躡軍後光縱騎擊之憲衆大潰虜其開府宇文英都督越勤世良韓延等又斬首三百餘級憲仍令榮及其大將軍中部公梁維都與景興士彥等步騎三萬於鹿盧交塞斷要路光與韓貴孫呼延族王顯等合擊大破之斬景興獲馬千疋詔加右丞相并州刺史

唐府元龜 立功七

卷之三十五十四

唐府元龜

淮南李嗣京參閱

西極文翔鳳訂正

豫章黃國琦較釋

將帥部

立功第八

後周蘇椿魏孝明正光中應募討關右賊授盩厔將軍累功遷奉朝請厲威將軍後領鄉兵破槃頭氏有功除散騎嘗侍加大都督

嘗安成魏正光末茹茹寇邊以統軍從鎮將慕容勝

唐府元龜 將帥部 卷之三十五十四

與戰大破之時破六汗枝陵作亂欲逼安成不從乃率所部討陵以功授伏波將軍給鼓節

梁臺魏孝昌中從爾朱天光平關隴一歲之中大小二十餘戰以功授都督

竇熾魏孝莊永安初從爾朱榮於并州時葛榮別帥韓婁郝長衆數萬人據薊城不下以熾爲都督從驃騎將軍侯深討之熾手斬婁以功拜揚烈將軍三年除武厲將軍西魏孝武卽位率兵隨東南道行臺樊子鵠追爾朱仲遠仲遠奔梁時又遣元樹入寇攻陷譙城遂據之子鵠令熾率騎兵擊破之封唐縣子後

遷撫軍將軍朱衣直閣遂從帝西遷仍與其兄善重至城下與武衛將軍高金龍戰於千秋門敗之朝入宮城取御馬四十四匹并鞍勒進之行在所帝大悅賜熾及善駿馬各二匹駑馬各十匹大統三年遷車騎將軍高仲密以北豫州來附熾率兵從太祖援之至雒陽會東魏人據却山爲陣太祖命留韜重於瀋曲率輕騎奮擊中軍與右軍大破之悉虜其步卒熾獨進至石濟而還十三年進驃騎大將軍恭帝元年進爵廣武郡公屬茹茹寇廣武熾率兵與柱國趙貴分路討之茹茹聞軍至引退熾渡河至麴伏川追及與

戰大破之斬其首帥郁久間是發獲生口數千及雜畜數萬頭

元定爲征虜將軍魏永安初從爾朱天光討闕隴羣賊並破之除襄威將軍及賀拔岳被害定從太祖討侯莫陳悅以功拜平遠將軍又從擊潼關拔迴雒城又從擒竇泰復弘農破沙苑戰河橋定皆先鋒當其前者無不披靡以前後功累遷都督征東將軍邙山之役敵人如堵定奮稍衝之殺傷甚衆太祖親觀之論功爲最

王勇魏永安中万候醜奴等寇亂闕隴勇召募隨軍

討之以功授寧朔將軍奉車都尉又數從侯莫陳悅賀拔岳征討功每居多拜別將後遷侍中驃騎大將軍開府儀同三司西魏恭帝元年從柱國趙貴征茹茹破之勇追擊獲雜畜數千頭進爵新陽郡公增邑通前二千戶仍賜姓庫汗氏

泉企爲右將軍浙州刺史魏永安中梁將王玄真入寇荊州加企節都督率衆援之遇玄真於順陽與戰大破之除撫軍將軍假節鎮南將軍東雍州刺史賀拔岳魏孝莊時爲都督副爾朱天光討万候醜奴于關中天光以軍事並委於岳遂大破赤水蜀賊軍

威大振時醜奴自率大衆圍岐州遣行臺尉遲菩薩
等自武功南渡渭天光遣岳率騎赴之岳身先士卒
擊之退走岳號令所部賊下馬者皆不聽殺賊頗見
之便悉投馬俄而虜獲三千餘人人馬無遺遂擒菩
薩降卒萬餘收其輜重醜奴尋棄岐州走安定平亭
天光自雍至岐與岳合勢軍於汧渭之間宣言遠近
曰今氣候漸熱非征討之時待至秋涼更圖進取醜
奴聞之遂以爲實分遣諸軍散營農於岐州之北百
里納川岳天光諸軍盡發掩之醜奴乃棄平亭而走
岳輕騎急追明日及醜奴於平涼之長坑一戰擒之

高平城中又執蕭寶寅以降天光又與岳度隴餘衆
皆降悉坑之死者萬七千人三秦河渭瓜涼鄯州咸
來歸欵天光雖爲元帥而岳功多進封清水公侍中
給後部鼓吹

侯莫陳崇初爲魏建威將軍隨賀拔岳入關破万侯
醜奴崇與輕騎逐北至淮州長坑及之賊未成列崇
單騎入賊中於馬上生擒醜奴於是大呼衆悉披靡
莫敢當之後騎集遂大破之岳以醜奴所乘馬及寶
劔金帶賞之後從太祖擒寶泰復弘農破汝薨戰河
橋又別討平稽胡累戰皆有功進位柱國大將軍

于惠以中堅將軍從賀拔岳西征定隴右每力戰有功累遷征西將軍

王盟為賀拔岳前鋒擒万俟醜奴平秦隴嘗先登力戰拜征西將軍平秦郡守及太祖東征以留後大都督行雍州刺史事節度關中諸軍趙青雀之亂盟與魏太子出頓渭北事平進爵長樂郡公增邑并前二千戶

寇雒從賀拔岳西征擒万俟醜奴於長坑雒每力戰有功累遷右都督

韓杲為賀拔岳帳內擊万俟醜奴及其枝黨轉戰數十合並破之後為征虜將軍從太祖復弘農攻拔河南城獲郡守一人論功為最破沙苑戰河橋並有功授撫軍將軍

劉亮以都督從賀拔岳西征及岳為侯莫陳悅所害亮與諸軍謀迎太祖仍從平悅後悅黨幽州刺史孫定兒據州不下涇秦諸州悉與相應衆至數萬推定兒為主以拒義師帝令亮襲之定兒以義兵猶遠未為之備亮輕將二十騎先豎一纛於近城高嶺即馳入城中定兒方置酒高會卒見亮衆皆駭愕莫知所為亮乃麾兵斬定兒懸首號令賊黨仍遙指城外纛

命二騎日出追大軍賊黨大懼一時降附於是諸州
皆歸欵伏文帝置十二軍簡諸將將之亮領一軍每
征討與怡峯俱爲騎將從擒竇泰復弘農與沙苑之
役並力戰有功遷車騎大將軍開府長廣公

怡峯以都督從賀拔岳討平隴右破竇泰復弘農敗
沙苑又與諸軍征討每皆尅捷累遷車騎大將軍開
府夏州刺史

李賢爲殿中將軍賀拔岳爲侯莫陳悅所害太祖西
征賢與其弟遠穆等密憲侯莫陳崇以功授都督仍
守原州及太祖至秦州悅棄城走太祖令兄子導勒

兵追之以賢爲前驅轉戰四百餘里至牽屯山及之
悅自到於陣賢亦被重瘡馬中流矢太祖嘉之賞奴
婢布帛及雜畜等授持節撫軍大將軍都督

賀拔勝魏孝武時爲驃騎大將軍開府荊州刺史勝
攻拔梁下差戍使人誘勸諸蠻皆率其種落歸欵漢
南大駭馮翊安沔陽並平之進位尚書令

李延孫爲直閣將軍賀拔勝爲荊州刺史表延孫爲
都督肅清鷓路頗有力焉會東魏遣行臺慕容紹宗
等數道來攻延孫獎勵所部出戰遂破之臨陣斬其
揚州刺史薛嘉族於是義軍更振乃授延孫京南行

臺節度南諸軍事廣州刺史

獨孤信爲魏武衛將軍從孝武入關時荊州雖陷東魏人心猶戀本朝乃以信兼尚書僕射南道行臺荊州刺史以招懷之信遂大破東魏將入破諸蠻三荆遂定就拜車騎大將軍

王雄爲驃騎大將軍率軍從子午谷圍梁上津魏與明年克之

宇文虬爲征虜將軍從獨孤信在荊州破梁人於下澧遂平歐陽鄴城虬俘獲甚多又攻南陽廣平二城擒郡守一人以功加安西將軍孝武西遷虬爲帳內

都督破田八能擒東魏荊州刺史辛慕虬功居多大統三年論前後功進爵爲公擒竇泰復弘農及沙苑河橋之戰皆有功進車騎將軍從獨孤信討梁企定破之進驃騎大將軍與王雄征上津魏興等並破之又於白馬與武陵王蕭紀將楊乾運戰破之尋而魏興復叛虬又與王雄討平之進位大將軍段永爲平東將軍孝武西遷永時不及從大統初乃結宗人潛謀歸欵密與都督趙業等襲斬西中郎將慕容顯和傳首京師以功別封昌平縣子徐州刺史從擒竇泰復弘農沙苑並有戰功進爵爲公河橋之

役永力戰先登授南汾州刺史累遷驃騎大將軍
賀蘭祥爲都督嘗居太祖帳下從平侯莫陳悅又迎
西魏孝武以前後功封撫夷縣伯邑五百戶仍從擊
潼關獲東魏將薛長儒又攻廻洛城拔之還拜左右
直長進爵爲公孝閔踐祚遷大司馬明帝武成初吐
谷渾侵涼州祥與宇文貴討之遂與廣定王鍾留王
等戰破之因拔其洮陽洪和二城以其地爲洮州撫
安西土振旅而還

王子真爲太祖行臺郎中漢熾屠各阻兵於西山與
隴東屠各共爲唇齒太祖令子真率涇州步騎五千
討破之西山平除尚書左丞兵部郎中

楊標爲車騎將軍拔東魏邵郡遷爲太祖大軍行臺
大丞齊神武敗於沙苑其將韓軌潘維可朱渾元等
爲殿標分兵要截殺傷甚衆東雍州刺史司馬恭懼
標威聲棄城遁走標遂移據東雍州文帝以標有謀
畧堪委邊任乃表行建州事時建州遠在敵境三百
餘里然標威恩夙著所經之處並贏糧附之北至建
州衆已數萬東魏刺史車折于維出兵逆戰標一鼓
敗之又破其行臺斛律俱步騎二萬於州西大獲甲
仗及軍資以給義士繇是威名大振時東魏以正平

爲東雍州遣薛榮祖募之標將謀取之乃先遣奇兵急攻汾橋榮祖果盡出城中戰士於汾橋拒守其夜標率騎兵二千從他道濟遂襲克之進驃騎將軍旣而邵郡民以邵東叛郡守郭武安脫身走免標又率兵攻而復之轉正平郡守又擊破東魏南絳郡虜其郡守屈僧珍錄前後功別封邵陽縣伯邑五百戶邨山之戰標攻拔栢谷塢因卽鎮之及大軍不利標亦拔還而東魏將侯景率騎追標標與儀同韋法保同心抗禦且戰且前經十數里景乃引退太祖嘉之賜帛三百疋復授建州刺史

趙剛爲營州刺史時滑州人鄭五醜構逆與叛羌傍乞鐵念相應令剛往鎮之會鄭五醜已尅定夷鎮所在立柵剛至並攻破之散其黨與五醜於是西奔鐵念剛又進破鐵念

郭賢爲車騎大將軍鎮魯陽又潁川被圍東魏遣蠻酋魯和扇動羣蠻規斷鴟路和乃遣其從弟典和爲廣漢郡守率其部曲侵擾州境賢密簡士馬輕往掩襲大破之遂擒魯和

陳忻爲潁州刺史留鎮靜邊時東魏將侯景築九曲城忻率衆邀之擒其宜陽郡守趙嵩金門郡守樂敬

賓後從李遠平九曲城授帥都督東魏將軍爾朱渾
頤率精騎三千來向宜陽忻與諸將輕兵邀之頤遂
退走累加車騎大將軍儀同三司散騎嘗侍與齊將
東方老戰於石泉破之俘獲甚衆時東魏每歲遣兵
送米饋宜陽忻輒與諸軍邀擊之每多克獲

王思政爲驃騎將軍荊州刺史東魏將侯景叛擁兵
梁鄭爲東魏所攻景乃請援乞師當時未卽應接思
政以爲若不因機進取後悔無及卽率荊州步騎萬
餘從魯關陽翟入守潁川景引兵豫州外稱畧地乃
密遣送款於梁思政分布諸軍據景七州十二鎮太

祖乃以所授景使持節太傅大將軍兼中書令河南
大行臺河南諸軍事廻授思政

泉仲遵爲征東將軍東魏北豫州刺史高仲密舉城
入附太祖率軍應之別遣仲遵隨于謹攻柏谷塢仲
遵及戰先登擒其將王顯明柏谷旣拔復會戰於邙
山後爲車騎大將軍梁荊州刺史柳仲禮每爲邊寇
太祖令仲遵率鄉兵從開府楊忠討之梁隨郡守桓
和拒守不降仲遵率先登城遂擒和仍從忠擊仲禮
又獲之進驃騎大將軍

楊雄爲積射將軍從于謹攻盤豆柵復從李遠經沙

苑陣並力戰有功加冠軍將軍後入雒陽戰河橋解
玉壁圍迎高仲密援侯景並預有功陳將侯方兒播
純隋寇江陵雄從豆盧寧擊走之

田弘爲帥都督太祖復弘農戰沙苑解雒陽圍破河
橋陣弘功居多累加驃騎大將軍平蜀之後梁信州
刺史蕭韶等各據所部未從朝化詔弘討平之又討
西平及羗及鳳州叛兵等並破之信州羣蠻反又詔
弘與賀若敦等平之保定三年從隨公楊忠伐齊拜
大將軍明年又從忠東伐師還所鎮吐谷渾寇西邊
宕昌羗潛相應接詔弘討之獲其二十五王拔其七

十六柵遂破平之天和中爲仁壽城主以逼宜陽齊
將段孝先斛律明月出軍定隴以爲宜陽援弘與陳
公純破之遂拔宜陽等九城以功增邑五百戶進爵
柱國大將軍因長公授其妻王女公主入齊景
嘗善爲平東將軍從太祖擒竇泰復弘農破沙苑累
有戰功除使持節衛將軍
豆盧寧以都督從太祖擒竇泰復弘農破沙苑除衛
大將軍兼大都督

權景宣爲行臺祠部郎中從太祖拔弘農破沙苑皆
先登陷陣後留景宣等守張白塢節度東南義軍東

魏將王元軌入雒景宣與延孫等擊走之以功授大
行臺左丞進屯宜陽攻襄城拔之獲郡守王洪顯俘
斬五百餘人太祖嘉之徵入朝錄前後功封顯親縣
男邑三百戶後爲車騎大將軍鎮荊州委以鷄南之
事初梁岳陽王蕭譽將以襄陽歸朝仍勒兵攻梁元
帝於江陵譽叛將杜岸乘虛襲之景宣乃率騎三千
助譽破岸譽因是乃送其妻王氏及子寮入質景宣
又與開府楊忠取梁將柳仲禮拔安陸隨郡進攻應
城拔之獲夏侯珍洽於是應禮安隨並平朝議以景
宣威行南服乃授并安肆郢新應六州諸軍事并州

刺史孝閔徵爲江陵防主加大將軍保定四年晉公
獲東討景宣別討河南齊豫州刺史王士良永州刺
史蕭世怡並以城降景宣以開府謝徵守永州開府
郭彥守豫州以士良世怡及降卒一千人歸詣京尋
而雒陽不守乃棄二州拔其將士而還至昌州而羅
陽蠻反景宣迴軍破之斬首千級獲生口一千雜畜
千頭送闕

王軌爲大將軍太祖總戎東伐六軍圍晉州刺史崔
景嵩守城北面夜中密遣送款詔令軌率衆應之未
明士登城鼓噪齊人駭懼因卽退走遂克晉州擒其

城主特進海昌王尉相貴俘甲士八千人於是遂從平并鄴以功進位上大將軍

趙昶爲大都督行南秦州事氏帥蓋開等反昶討擒之又與史寧破宕昌羗獠二十餘萬拜武州刺史裴杲爲平東將軍從開府楊忠平隨安陸以功加大都督又從大將軍尉遲迥伐蜀杲率所部爲前軍開劔閣破李慶堡降楊乾運皆有功

梁椿爲驃騎大將軍從李弼赴潁川援侯景別攻閬韓鎮斬其鎮城徐衛城主卜貴維率軍士千人降叱羅協爲尉遲迥行軍長史伐蜀旣入劔閣迥令行

潼州事時有五郡城氏酋趙雄傑等扇動新潼始三州民反叛聚結二萬餘人在州南三百隔涪水據槐林山置柵拒守梓潼郡民鄧朏王令公等招誘鄉邑萬餘人復在州東十里涪水北置柵以應之同逼州城城中糧少軍人之食協撫安內外咸無異心遣儀同伊婁訓大都督司馬裔等將步騎千餘人夜渡涪水擊雄傑一戰破之令公以雄傑敗亦棄柵走還本郡復與鄧朏等更率萬餘人於近東南隔水置柵斷絕驛路協遣儀同楊長樂與司馬裔等率師討之復遣大都督裴孟嘗領百騎繼進爲其聲勢孟嘗旣至

梓潼值水長不得卽渡而王令公鄧朏見孟嘗騎少
乃將三千餘人圍之數重孟嘗以衆寡不敵各棄馬
短兵接戰從辰至午於陣斬令公及鄧朏等賊徒旣
失渠帥遂卽散走其從黨乃據舊柵而孟嘗方得渡
水與長樂合兵卽攻柵經三日賊乃請降此後數有
反叛協輒遣兵討平之

達奚武爲驃騎大將軍率兵三萬經畧漢川梁將楊
賢等以武興白馬降梁州刺史蕭循固守南鄭武圍
之其將楊乾運等將兵萬餘救之武逆擊乾運大破
之循乃降率所部男女二萬口入朝白劔已北悉平

楊寬爲大丞相府司馬朝議欲經畧漢川梁宜豐侯
蕭循固守南鄭寬從大將軍達奚武討之梁武陵王
蕭紀遣將楊乾運率兵萬餘人救循武陵令寬都督
開府王傑賀蘭願德等邀擊之軍至白馬乾運合戰
破之俘斬數千人軍還除南幽州刺史

賀若敦爲驃騎大將軍時岷蜀初開民情尚梗巴西
人譙淹據南梁與梁西江州刺史至開業共爲表裏
扇動羣蠻太祖令敦率軍討之山路艱難人迹罕至
敦身先將士攀木緣崖倍道兼行乘其不意又遣儀
同扶猛破其別帥向鎮侯於白帝淹乃與開業并其

黨帛王成侯造等率衆七千口累三萬自墊江而下就梁王琳敦邀擊破之淹復依山立柵南引蠻帥向白虎爲援敦設反間離其黨與因其懈怠復破之斬淹盡俘其衆

扶猛爲大將軍羅州刺史率所部千人從開府賀若敦南討信州敦令猛別道直趣白帝所繇之路人迹不通猛乃梯山捫葛備歷艱阻雪深七尺糧運不繼猛勸獎士卒兼夜而行遂至白帝刺史向鎮侯列陳拒猛猛與戰破之乘勝而進入白帝城撫慰民夷莫不悅服武帝保定中又從田弘破漢南諸蠻前後十餘戰每有功進位大將軍

子遷哲爲驃騎大將軍與田訥同討信州軍次并州刺史杜滿谷望風送款進圖豐州克之獲刺史舟助國等遷哲每率驍勇爲前鋒所有攻戰無不身先士卒凡下十八州拓地二千餘里時信州爲蠻酋向五子等所圖弘又遣遷哲入據白帝賀若敦等復至遂共追擊五子主等破之及田弘旋軍帝令遷哲留鎮白帝

陸騰爲車騎大將軍安康貺黃衆寶等作亂連結中衆數萬人攻圍東梁州城中糧盡詔騰率軍自子午

谷以援之騰乃呈言就道至便與戰大破之軍還遷
龍州刺史信州蠻蛋據江碛反叛連結二千餘里自
稱王侯殺刺史守令等又詔騰率軍討之騰乃先趨
益州進驍勇之士兼具樓船沿外江而下軍至湯口
分道奮擊所向摧破乃築京觀以旌武功騰既破信
州蠻蛋涪陵郡守藺休祖又據楚向臨容開信等州
地方二千餘里阻兵爲亂復詔騰討之初與大戰斬
首二千餘級俘獲千餘人當時雖摧其鋒而賊衆旣
多自夏及秋無日不戰師老糧盡遂停軍集市更思
方畧賊見騰不出四面競前騰乃激勵其衆士皆爭

奮復攻拔其魚令城大獲糧儲以克軍實又破銅盤
等七柵前後斬獲四千人并船艦等又築臨州集市
二城以鎮遏之後遷江陵總管陳遣其將章昭達率
衆五萬船艦二千圍江陵衛王直聞有陳寇遣大將
軍趙闇李遷哲等率步騎赴之並授騰節度時遷哲
等守外城陳將程文季雷道勤夜來掩襲遷哲等驚
亂不能抗禦騰夜遣開門出甲士奮擊大破之陳人
奔潰道勤中流矢而斃虜獲二百餘人陳人又決龍
川寧邦堤引水灌江陵城騰親率將士戰於西堤破
之斬首數千級陳人乃遁

尉遲迥爲伐蜀都督督開府元珍乙弗亞万侯呂陵
始叱奴興綦連雄六昇等六軍甲士一萬二千騎萬
匹伐蜀以魏廢帝二年春自散關繇故道出白馬趣
晉壽關平林舊道前軍臨劔閣蕭紀安州刺史樂廣
以州先降紀梁州刺史楊乾運時鎮潼州又降六月
迥自潼州大饗將士引之而西紀益州刺史蕭撝不
敢戰遂嬰城自守進軍圍之初紀至巴郡聞迥來侵
遣燕掩迥師爲搆外援迥分遣元珍乙弗亞等以輕
騎破之遂降前後戰數十合皆爲迥所破撝與紀子
宜都王蕭大圓率其文武官屬詣軍門請見迥以禮

接之其吏人合營等各令復業唯收僮隸及儲積以
賞將士號令嚴肅軍無私馬詔迥爲大都督益等十
八州諸軍事益州刺史蕭撝
任杲爲沙州刺史率鄉兵二千人從尉遲迥征蜀尋
進授驃騎大將軍開府儀同三司蕭紀遣趙跋扈等
率衆三萬來援成都杲從大將軍擊破之及成都平
除始州刺史蕭撝
于謹爲柱國大將軍梁元帝平侯景之後於江陵嗣
位密與齊氏通使將謀侵軼其兄子岳陽王譽時爲
雍州刺史以梁元帝殺其兄譽遂結讎隙據襄陽來

附仍請王師乃令謹率衆出討文帝餞於青泥谷謹乃令中山公護及大將軍楊忠等率精騎先據江津斷其走路梁人豎木柵於城外廣輪六十里尋而謹至悉衆圍之梁主屢遣兵出戰爲謹所破旬有六日外城遂陷梁主退保子城翼日率其太子已下面縛降尋殺之虜其男女十餘萬人收其府庫珍寶得宋渾天儀梁日畧銅表魏相風烏銅蟠螭跌大玉徑四尺圍七尺及諸輦輦以獻軍無私焉立蕭譽爲梁主振旅而旋

蔡祐爲中領軍江陵初附諸蠻騷動詔祐與六將軍豆盧寧討平之

史寧爲持節都督涼州諸軍事初茹茹與魏和親後更離叛尋爲突厥所破殺其毛阿那環部落逃逸者仍奉環之子二人并其種落酋長自是每戰破之前後獲數萬人進爵安政郡公就拜大將軍時突厥木汗可汗假道涼州將襲吐渾太祖令寧率騎隨之軍至番木吐渾已覺奔于南山木汗將分兵追之令俱會于青海寧謂木汗曰樹敦賀真二城是吐渾巢穴今若拔其本根餘種自然離散此上策也木汗從之卽分爲兩軍木汗從北道向賀真寧趣樹敦渾娑周

國王率衆逆戰寧擊斬之踰山履險遂至樹敦敦是
渾之舊都多諸珍藏而渾王先已奔賀真留其征南
王及數千人固守寧進兵攻之僞退渾人果開門逐
之因廻兵奮擊門未及闔寧兵遂得入生獲其征南
王俘虜男女財寶盡歸諸突厥渾賀羅拔王依險爲
柵周廻五十餘里欲塞寧路寧攻其柵破之俘斬萬
計獲雜畜數萬頭木汗亦破賀真虜渾王妻子大獲
珍物寧軍於青海與木汗會木汗握寧手歎其勇決
并遺所乘良馬令寧於帳前乘之木汗親自步送突
厥以寧所圍必破皆畏憚之咸曰此中國神智人也

乃將班師木汗又遺寧奴婢一百口馬五百匹羊一
萬口寧乃還州

魏玄爲大都督維安民雍方焦據郡外叛率步騎一
千自號行臺攻破郡國囚執寧令玄率弘農九曲孔
城伏流四城士馬討平之武帝保定四年轉和州刺
史伏流防至五年齊將斛律明月率衆向宜陽兵威
甚盛玄率兵禦之每戰輒克

辛威爲大將軍武帝保定初率兵討丹州叛胡破之
三年與達奚武攻陽關拔之明年從尉遲迥圍維陽
還拜小司馬天和初進位柱國復爲行軍總管討綏

張等諸州叛胡并平之六年從齊王憲東伐拔伏龍
等五城

劉雄為驃騎大將軍天和中齊人於姚襄築伏龍等
五城以處戎卒雄從齊公憲攻之五城皆拔憲復遣
雄從柱國李穆出軹關攻邵州等城拔之以功獲賞
五千皇太子西征吐谷渾雄自涼州從滕王道率軍
先入渾境去伏候城二百餘里道遣雄先至城東舉
火與大軍相應渾洮王率七百餘騎逆戰雄時所部
數百人先並分遣斥侯在左右者二十許人雄即率
與交戰斬首七十餘級雄亦亡其三騎自是從道連

戰之雄功居多賞物甚厚王大軍東討雄從齊王憲
拔洪洞下永安軍還仍與憲廻援晉州未至齊後王
已率大兵親自攻圍晉州垂陷憲遣雄先往察其軍
勢雄乃率步騎千人鳴鼓角遙報城中尋而高祖兵
至齊王遁走從平并州拜上大將軍
斛遲運為左武伯中大夫軍司馬天和末齊將斛律
明月寇江北運從齊公憲禦之拔其龍城進爵廣業
郡公增邑八百戶建德元年為右宮正時帝幸雲陽
宮又令運以本官兼司武與長孫覽皇太子居守俄
而衛刺王直作亂率其黨襲肅章門覽懼走行在運

時偶在門中直兵奄至不暇命左右乃手自闔門直黨與運爭門斫傷運指僅而得閉直黨不得進乃取宮中材木及牀第等以益火更以膏油灌之火勢轉熾久之直不得進乃退運率留守兵因其退以擊之直大敗而走是日非運宮中已不守矣帝嘉之授大將軍賜以直田宅妓樂金帛車馬及什物等不可勝數

章孝寬爲雍州刺史武帝東伐趙王招率岳出稽胡與大將軍倚角乃勅孝寬爲行軍總管圍守華谷以應接之孝寬尅其四城武帝平晉州復令孝寬還舊

鎮時尉遲迥叛詔發關中兵以孝寬爲元帥東伐軍次河陽迥所署儀同薛公禮等圍逼懷州孝寬遣兵擊破之進次懷縣永橋城之東南其城旣在要衝雉堞牢固迥已遣兵據之諸將士以此城當路請先攻取孝寬曰城小而固若攻而不拔損我兵威今破其大軍此亦何能爲也於是引軍次於武陟大破迥子惇惇輕騎奔鄴軍次于鄴西門豹祠之南迥窮迫自殺兵士在小城中者盡坑於游豫園諸有未服皆隨機討之關東悉平

李澈武帝時從皇太子西征吐谷渾以功賜爵周昌

縣男從武帝平齊錄前後功再進爵遷左武衛將軍
杜整為儀同武州刺史從武帝平齊加上儀同進爵
平原縣公

